

AMBIDIN'ISOTRY, ANOSIBE SY NY MANODIDINA

Olona miisa 58 voasambotry ny polisy tao anatin'ny 1 alina monja

Nanao be midina tany anaty elakelantano afak'omaly alina ny polisim-pirenena, tao ireo nanao fanamiana, nisy ihany koa ireo nanao akanjo sivily. Vokany, olona miisa 58 no voasambotr'izy ireo nandritra ny indray alina monja io tao Anosibe sy ny manodidina, ao amin'ny Boriboritany faha-4. Tao ireo tratra nitondra antsy lava, tao ihany koa ireo nitondra entana avy nangalarina, niampy ireo tsy fanarahan-dalana maro samihafa. Ho an'ireo



Ireo olon-dratsy voasambotry ny polisim-pirenena.

kaomisaria eto an-drenivohitra dia maro tamin'izy ireo, no nanao fanamiana sivily nitsofoka elakelan-

trano, ka noraisim-potsiny avokoa ireo mpanao ratsy, toy ireo mpanadaka tratra tetsy Ambo-din'Isotry tamin'ny 05 ora maraina, tovolahy avy nangalatra kodiarana fiara, andian-jatovo mitondra zava-maranitra ary lehilahy maromaro tratra nifoka rangony. Misy hatrany ny fidinana ifotony ataon'ny Polisim-pirenena toy izao, indrindra amin'ireny faritra mafana ireny ho fiarovana ny vahoaka sy ny fananany.

Stefa

Mpianatra ho zandary, Ambositra

Nanaovana fanentanana momba ny ady amin'ny zava-mahadomelina

Nanaovana fanentanana momba ny ady amin'ny zava-mahadomelina ireo mpianatra ho zandary any Ambositra, faritra Amoron'i Mania. Nanatontosa atrik'asa manokana mahakasika ny fisorohana sy ady amin'ny loza ateraky ny zava-mahadomelina, tao amin'ny Sekolin'ny Zandarimariam-pirenena Ambositra ny dokotera Miriantsoa Andriamiarina-



Ireo mpianatra ho zandary niofana.

rivo, Filohan'ny ivon-toerana fitsaboana Aro Aina eny Ambohidratrimo Antananarivo, tamin'ity herinandro ity. Ny votoatin'ny atrik'asa dia ny fifampizaràna ny momba ny zava-mahadomelina sy ny voka-dratsiny, ny fisian'ny ivon-toerana Aro Aina sy ny andraikiny. Ny tanjona dia ny fisorohana ny hambana mety hitranga, na ny hisian'ny fidrohana sy fianki-

nan-doha amin'ity zava-doza ity ao anatin'ny Zandarimaria. Nisitrika izany fanentanana izany ireo Zandary mpanofana sy mpanabe ao amin'ny Sekoly, izay notarihin'ny Jeneraly Harilaza Ranai-vonampoizina, Komandin'ny Sekolin'ny Zandarimariam-pirenena ao Ambositra.

Niaina

Peace Corps Amerikana

Miverina miasa eto Madagasikara ireo mpilatsaka an-tsitrapo

Miverina miasa eto Madagasikara indray ireo mpilatsaka an-tsitrapo amin'ny Peace Corps Amerikana. Noraisin'ny Peace Corps tamin'ny fomba ofisialy ireo mpilatsaka an-tsitrapo roa, izay tonga eto Madagasikara ary nanao ny fianianana mia-lohina ny handraisany ny asany tamin'ny talata, teo anatrehan'ny Ambasadaoro Claire A. Pierangelo, sy ny Talen'ny Peace Corps eto Madagasikara Brett Coleman. Ireo mpilatsaka an-tsitrapo ireo dia isan'ireo tsy maintsy nandao an'i Madagasikara tamin'ny taona 2020 vokatry ny valan'aretina Covid-19. Tonga teto Antananarivo izy ireo tamin'ny fiandohan'ity volana ity ary namerina nanamafy ny fahaizany teny malagasy indray, tao anatin'ny tapa-bolana ahafahany mandray ny asa maha-mpampianatra teny anglisy azy ireo any amin'ny sekoly ambaratonga faharoa. Niarahaba ireo mpilatsaka an-tsitrapo ireo ny Ambasadaoro Pierangelo, sady nisaotra ireo mpiasa ao amin'ny Peace Corps. Nasongadiny ny mahazava-dehibe ny fianianana izay ataon'ireo mpi-



Ireo mpilatsaka an-tsitrapo Amerikana, miverina miasa eto amintsika (afovoany).

latsaka an-tsitrapo tsirairay ary nampahatsiahi-viny, fa mitovy amin'ny fianianana ataon'ny Filoha Amerikana, sy ireo tompon'andraiki-panjakana ambony amerikana izany. Andriamatoa Coleman, izay talen'ny Peace Corps Madagasikara nanaovana ny taona 2019, dia nametraka ny lanjan'ny asan'ireo mpiasa Malagasy ao amin'ny Peace Corps. Izy ireo no nikolokolo ny fifandraisan'ny Peace Corps, sy ireo fiarahamonina miaramiasa aminy tamin'ny alalan'ny fanofanana momba ny fambolena sy fampianarana nandritra ny fotoana tsy naha-teo ireo

mpilatsaka an-tsitrapo. Naboana ny toeram-pitsaboana CSB tao Mantsoa ihany koa ireo mpiasan'ny Peace Corps, tamin'ny fanentanana momba ny fanaovana vaksiny miaro amin'ny Covid-19, ka nahatonga ny tahan'ny fanaovam-baksiny tany an-toerana ho tafakatra mihoatra ny 60%. Notsipihany fa "ireo mpilatsaka an-tsitrapo no fototry ny asanay noho ny fahaizamanao izay entin'izy ireo ho an'ireo fiarahamonina izay mandray azy, fa indrindra koa noho ny fihavanana kolokoloin'izy ireo, izay mahasoana ny fitenentsika roa tonta. Faly

izahay noho izany mahita fa niverina indray izy ireo roa taona sy tapany taty aoriana." Mbola hisy mpilatsaka an-tsitrapo 30 fanampiny ho avy eto Madagasikara amin'ity volana ity, hampianatra teny anglisy sy hiasa amin'ny sehatry ny fambolena. Hiampy 45 ireo mpilatsaka an-tsitrapo ireo amin'ny volana Febroary 2023. Raha ny fikasan'ny Peace Corps dia ho tafaverina amin'ny endriny talohan'ny valan'aretina Covid-19 ny asan'izy ireo eto Madagasikara ato anatin'ny roa taona, ka hahatratra 150 indray ireo mpilatsaka an-tsitrapo am-perinasa. Tamin'ny taona 1961, no noforonon'ny Filoha Amerikana John F. Kennedy ny Peace Corps. Hatramin'ny fotoana nijoroany, ny Peace Corps dia nifantoka hatrany tamin'ny fampiboroboana ny fandiampahalemana maneran-tany, sy ny fihavanana ary tsy nivoana tamin'izany. Nanomboka ny taona 1961 dia nihoatra ny 241000 ireo mpilatsaka an-tsitrapo niasa tamin'ny firenena 141, ka ny 1574 tamin'ireo dia niasa teto Madagasikara.

Aly

Voka-panadinana

49,72 % ny taham-pahafahana bacc tany Toliara

Nivoaka ihany koa izao ny voka-panadinana bakalôrea (bacc) tany Toliara. 49,72 % ny taham-pahafahana fanadinana tany an-toerana. Tamin'ireo kandida miisa 21848 nanala io fanadinam-panjakana io, 10 863 no afaka, manome io tahany isan-jato 49,72 % io. Teo amin'ny bacc ankapobeny : 48,78 % no taham-pahafahana. Tao amin'ny sokajy A : 61,83 %; A2 : 47,93 %; C : 58,67 %; D : 46,66 %; L : 55,74 %; S : 54,37 %; OSE : 61,13 %. Ho an'ny sokajy teknika sy teknôlôjika: 85,54 % ny taham-pahafahana back teknika tany Toliara.

Aly



Voka-panadinana bacc.

Baolina kitra

Fantatra ireo mpilalao 23 handrafitra ny Barea Chan

Fantatra tamin'ny famoahan'ny mpanazatra Rôrd, ny lisitr'ireo mpilalaoan'ny Barea Chan miisa 23, hiatrika ny lalao mandroso hifanandrian'ny Madagasikara amin'ny ekipam-pirenena U23 Botswanaise, izay ho tontosaina amin'ny 27 aogositra 2022 ao amin'ny kianja « Obed Itani Chilume Stadium » any Francistown Botswana ary koa ny lalao miverina, ho tontosaina amin'ny zoma 2 septambra 2022 izao hanomboka amin'ny 4 ora tolakandro etsy amin'ny Kianjan'i Mahamasina.

Mpiandry harato : Rakotohasimbola Zakanirina (Elgeco Plus), Andriamalala Andoniaina (Disciples Fc), Vodilaharana : Safidinomenjanahary Naurah E. (Cffa), Razafindraibe Rajo (Jet Kintana), Randrianiaina Tanteley Antoine (Disciples Fc), Rakotonirina Jean Martin (Elgeco Plus), Randriamanampisoa Elysée Tony (Elgeco Plus).

Irakiraka : Rakotondrazaka Ando (Disciples Fc), Raborijaona Tanteley Avotriaina (Cffa), Andriamromampiana T. Steeve (As Fanalamanga), Rafanomezantsoa Lalaina (Cffa), Andriamanjato Rojolahaina (Ajesaia), Andriamirado Arohasina Dax (Fosa Juniors), Andriatsiferana Toky Olivier (Fosa Juniors), Rajaoanavelo Ryan Hery (Disciples Fc), Ravelomanantsoa Marcio Carlos (Cffa), Rakotoarisoa Solonjatovo J.A (Elgeco Plus). Lohararana : Kasimo Lucien (Elgeco Plus), Razafindrakoto Jean Yvon (Fosa Juniors), Fanomezantsoa Tsilavina (Fosa Juniors), Abedi Simael Albert (As Fanalamanga), Randrianarijaona T.M. Mataniah (Disciples Fc), Razafindranaivo S.Koloina (Cffa). Marihana fa tamin'ny alakamisy faha 18 aogositra 2022 teo dia niatrika lalao ara-pirahalaina, tetsy amin'ny kianja « Elgeco Plus Stadium By Pass », tamin'ny ekipan'ny Elgeco Plus tompon'ny amboaran'ny Madagasikara ity Barea Chan ity, ka lavon'ity farany tamin'ny isa 4 – 1. Fotoana nahafan'ny mpanazatra Rôrd namantatra ny "Forme physique" sy ny "rythme" an'ireo mpilalao vaovao maromaro nantsoiny ary ihany koa, ahafahany mamaritra ny paikady rehetra hanatratrara ny tanjona : dia ny hibatanana ny fandresena amin'ireo lalao hifanandrianana amin'i Botswana ity fihonana ity.

Rainilita



Barea Chan tetsy amin'ny By Pass.